



REPUBLIKA E SHQIPËRISË
KUVENDI

MIRATOHET

KRYETARË

Lindita NIKOLLA



REZOLUTË

**PËR VLERËSIMIN E VEPRIMTARISË SË INSPEKTORATIT TË LARTË
TË DEKLARIMIT DHE KONTROLLIT TË PASURIVE DHE KONFLIKTIT
TË INTERESAVE PËR VITIN 2021**

Kuvendi i Shqipërisë,

Duke besuar në objektivat dhe përpjekjet e vendit tonë për intensifikimin e luftës kundër korrupsionit, si kusht dhe detyrim thelbësor në kuadër të procesit të integritetit dhe anëtarësimit në Bashkimin Europian;

Duke theksuar rëndësinë e koordinimit dhe forcimit të bashkëpunimit ndërmjet institucioneve përgjegjëse ligjzbatuese në vend dhe institucioneve të pavarura për rritjen e efikasitetit të hetimeve penale apo administrative, si dhe ndëshkimin e praktikave korruptive, me qëllim arritjen e rezultateve konkrete dhe të prekshme në parandalimin dhe luftën ndaj korrupsionit;

Duke vlerësuar gjetjet në raportin për Shqipërinë për vitin 2021 të Komisionit Europian në lidhje me progresin e shënuar nga Inspektorati, si dhe mbështetjen e vazhdueshme nga partnerët ndërkombëtarë për përmbushjen e objektivave prioritarë të institucionit;

Duke inkurajuar e mbështetur Inspektoratin me forcimin e kapaciteteve administrative, teknike, financiare dhe të instrumenteve ligjore me qëllim përmbushjen e misionit institucional për zbulimin e pasurimit korruptiv dhe praktikave të ngjashme me të, në parandalimin e konfliktit të interesave për të gjitha kategoritë e zyrtarëve, subjekteve të ligjit dhe personave të lidhur, si dhe inkurajimin për denoncimin e tyre,

Vlerëson veprimtarinë e Inspektoratit të Lartë të Deklarimit dhe Kontrollit të Pasurive dhe Konfliktit të Interesave për vitin 2021 në drejtim të:

Progresit të shënuar në funksionimin tërësor institucional dhe në veçanti në përmbushjen e të gjitha rekomandimeve të lëna në rezolutën e Kuvendit “Për vlerësimin e veprimtarisë së Inspektoratit të Lartë të Deklarimit dhe Kontrollit të Pasurive dhe Konfliktit të Interesave për vitin 2020”.

Angazhimit në përputhje me rekomandimet e progresraportit të KE-së dhe GRECO-s për përfundimin dhe vënien në funksion të plotë brenda vitit 2021 të sistemit elektronik të interesave private, hartimin dhe miratimin e akteve të nevojshme nënligjore për formularët e deklarimit dhe mënyrën e plotësisimit të tyre, si dhe organizimin e disa sesioneve trajnuese për këtë qëllim në bashkëpunim me Këshillin e Europës, ku janë trajnuar më shumë se 280 pjesëmarrës.

Zbulimit të rasteve të fshehjeve të pasurisë, si dhe shkeljeve të ndryshme të ligjit për deklarimin e interesave private, duke administruar një numër total prej 4032 deklaratash e interesave private, duke kaluar në kontroll të plotë për verifikimin e vërtetësisë dhe saktësisë së të dhënave që përmbahen në deklaratën e pasurisë dhe të interesave private 802 subjekte deklaruese, duke ndëshkuar me masën administrative “gjobë” për rastet e refuzimeve për deklarim, rastet e mosdeklarimeve dhe rastet e konfliktit të interesit 130 zyrtarë, si dhe duke paraqitur pranë prokurorisë, Drejtorisë së Përgjithshme të Parandalimit të Pastrimit të Parave, Policisë së Shtetit dhe strukturave të hetimit tatimor 16 raste referimesh penale.

Mbështetjes së procesit reformues të sistemit të drejtësisë, me fokus të veçantë forcimin e bashkëpunimit me organet e rivlerësimit dhe ONM-në nëpërmjet trajtimit me përparësi të 155 kërkesave të ardhura nga këto institucione, si dhe në zbatim të detyrimeve të përcaktuara në ligjin për organet e qeverisjes së sistemit të drejtësisë dhe ligjit për organizimin dhe funksionimin e Prokurorisë së Përgjithshme, nga Inspektorati është ushtruar kontroll i plotë për 312 kandidatë në organet e ndryshme të sistemit të drejtësisë.

Administrimit dhe analizimit të 520 raportimeve të dërguara nga njësitë përgjegjëse të ngritura në zbatim të ligjit nr. 60/2016 “Për sinjalizimin dhe mbrojtjen e sinjalizuesve”, nga të cilat 199 i përkasin sektorit publik dhe 321 sektorit privat, si dhe përditësimit të të dhënave të regjistrave kombëtarë të këtyre njësive.

Monitorimit të kujdesshëm dhe të vazhdueshëm të zbatimit të ligjit nr. 60/2016 “Për sinjalizimin dhe mbrojtjen e sinjalizuesve”, në bashkëpunim intensiv me Komisionerin për të Drejtën e Informimit dhe Mbrojtjen e të Dhënave Personale, Departamentin e Administratës Publike dhe Drejtorinë e Përgjithshme të Tatimeve.

Regjistrimit dhe trajtimit në zbatim të kompetencave ligjore, si mekanizëm i jashtëm raportimi për sinjalizimin dhe kërkesat për mbrojtje nga hakmarrja të 11 rasteve të sinjalizimit dhe 1 kërkesë për mbrojtje nga hakmarrja.

Rritjes së kapaciteteve të njësive përgjegjëse të ngritura në sektorin publik dhe privat në kuadër të zbatimit të ligjit për sinjalizimin nëpërmjet organizimit të disa sesioneve trajnuese në bashkëpunim me prezencën e OSBE-së në Shqipëri gjatë periudhës 24 qershor- 2 korrik 2021, në të cilat u trajnuan 220 anëtarë të njësive përgjegjëse.

Nënshkrimit të Memorandumit të Bashkëpunimit me Agjencinë e Prokurimit Publik, në funksion të rritjes së integritetit të zyrtarëve publikë në prokurime dhe ndërgjegjësimin e tyre për zhvillimin e procedurave në mënyrë të pavarur.

Intensifikimit të trajnimeve për stafin e Inspektoratit nëpërmjet pjesëmarrjes në trajnimet e organizuara nga Prokuroria e Përgjithshme për veprat penale në fushën e pastrimit të parave, si dhe trajnimet e organizuara në bashkëpunim me Këshillin e Europës apo GIZ-in mbi praktikat më të mira europiane dhe ndërkombëtare në fushën e konfliktit të interesit apo parandalimit të pastrimit të parave.

Ndjekjes së një politike të hapur me qytetarët e shoqërinë civile, si dhe forcimin e bashkëpunimit me median investigative në veçanti, duke trajtuar me përparësi, korrektësi dhe brenda afateve ligjore kërkesat e publikut në lidhje me publikimin e deklaratave të interesave private.

Kuvendi kërkon që Inspektorati i Lartë i Deklarimit dhe Kontrollit të Pasurive dhe Konfliktit të Interesave për vitin 2022 të vazhdojë punën në këto drejtime:

1. Të ketë prioritet të punës verifikimin e kandidatëve në organet e ndryshme të sistemit të drejtësisë.

2. Të marrë të gjitha masat institucionale për funksionimin e plotë të sistemit elektronik të deklarimit të interesave private, me fokus rritjen e kapaciteteve të autoriteteve përgjegjëse për plotësimin e deklarimeve nga subjektet e ligjit në mënyrë të saktë.

3. Të intensifikojë bashkëpunimin ndërinstitucional me Koordinatorin Kombëtar Kundër Korrupsionit, si dhe organet ligjzbatuese, në veçanti me SPAK-un, për të përmirësuar në mënyrë të efektshme ndjekjen e hetimeve administrative ose penale në drejtim të interesave private të deklaruar nga zyrtarët, të cilët janë subjekt i ligjit për deklarimin dhe parandalimin e konfliktit të interesave.

4. Të adresojë në mënyrë të efektshme rekomandimet e lëna nga organizatat ndërkombëtare, përfshirë edhe rekomandimet e lëna në raportin e vlerësimit të Grupit të Shteteve të Këshillit të Europës kundër Korrupsionit (GRECO) për përmbushjen e angazhimeve të ndërmarra në kuadër të proceseve integruese.

5. Të krijojë instrumente të qëndrueshme në veprimtarinë e saj, që mundësojnë fuqizimin e rolit proaktiv në drejtim të monitorimit sistematik të njësive përgjegjëse për zbatimin efektiv të ligjit nr. 60/2016 “Për sinjalizimin dhe mbrojtjen e sinjalizuesve”.

6. Të angazhojë kapacitetet administrative në dhënien e asistencës së nevojshme, përfshirë udhëzime specifike, këshilla dhe trajnime organeve përgjegjëse të institucioneve shtetërore për zbatimin e saktë të dispozitave ligjore për konfliktin e interesit, veçanërisht për evidentimin e saktë të deklarimeve rast pas rasti, të cilat nga raportet e organizmave ndërkombëtarë nuk zbatohen.

7. Të forcojë bashkëpunimin me shoqërinë civile, medien dhe publikun e gjerë për informacionet e dhëna për rastet e denoncimit të shkeljes së ligjit për deklarimin e interesave private pasurore, për rastet e identifikimit të konfliktit të interesave, si dhe për rastet e dyshuara të korrupsionit në sektorin publik dhe privat.

8. Të nxitet për të paraqitur në Kuvend nevojat për rritje të kapaciteteve administrative dhe financiare, me qëllim përmbushjen e detyrave funksionale të ngarkuara nga kuadri ligjor në fuqi.

Miraturar në datën 21.7.2022